



# 1001 Masalah

Abu Al-Mokhtar Sedia Menjawab.

## Payah Dapat Pasport

Yahya bin Isa, Kampung Berhala Tujung,

Nafaradu, Kok Pur, Thailand, bertanya:

Mengapa rakyat Malaya sangat susah hendak mengambil pasport untuk menyambung pelajarannya ke Indonesia.

Adakah ia hanya melalui kerajaan British?

Jawab: Mengambil atau membuat sesuatu pasport

bagi seseorang yang menjadi rakyat Malaya bukanlah ia seperkara yang susah. Tiap-tiap seorang, apabila sempurna menunaikan syarat-syaratnya sebagai rakyat Malaya tidaklah payah hendak mengambil pasportnya.

Tetapi mengenai ke Indonesia, maka seseorang yang hendak masuk ke sana, apa lagi hendak belajar dan menuntut ilmu di sekolah-sekolah yang tertentu maka mohonan itu tidak kepada kerajaan British tetapi dihadapkan kepada

Duta atau wakil kerajaan Indonesia yang berada di Malaya.

Permintaan itu susah diberi kepada mereka sebab kerajaan Indonesia terlebih dahulu wajib menyelidiki keadaan orang-orang atau penuntut-penuntut yang hendak pergi itu. Adakah orang-orang yang menanggung perbelanjaan dan menjamin keselamatannya apabila berada di sana kelak.

Sebaliknya kerajaan Malaya juga yang sekarang ada mempunyai Duta di Indonesia wajib pula mengetahui keadaan-keadaan itu supaya kelak mereka jangan terlantar di sana -

jangan menderita kesulitan-kesulitan yang bakal dihadapinya kerana kedutaan Malaya, jika terjadi kesusahan mereka akan bertanggungjawab untuk memulangkan mereka.

Menurut yang kami ketahui dengan adanya Duta Malaya tidaklah lagi diurus oleh kerajaan British.

## Insurans nyawa dan saving bank

Abdul Ghani, Berchang, Kuala Lipis, bertanya:

Bagaimana hukumnya kalau menyimpan wang saving bank (1) dan masuk insurans nyawa (2), dan kalau menyimpan di kedua tempat itu tidak diperkenankan oleh Islam bagaimana hendak menyimpan wang sebaik-baiknya (3)?

Jawab: (1) Perkara menyimpan wang di saving bank dan masuk insurans nyawa telah di jawab di dalam ruangan ini dengan panjang. Mengenai saving bank tidak apa menyimpan di dalamnya untuk keselamatan dan mengenai bunganya hendaklah saudara ambil kemudian berilah kepada kebijakan kerana kalau bunga itu tidak diambil faedahnya akan diberi kepada agama lain yang boleh menekan semula kepada kita.

Mengenai (2) insurans nyawa telah pernah dijawab dengan menyatakan agama tidak membolehkannya.

Mengenai perkara yang ketiga maka nampaknya saudara sendiri telah menjatuhkan hukum atas pertanyaan (1) iaitu haramnya dengan *i'lāq*. Sebenarnya saudara boleh menyimpan di sana asalkan jangan memakan bunganya. Menyimpan lebih aman tentunya lebih baik di bank iaitu dengan menggunakan "current account" atau menyimpan di dalam bank box – iaitu peti menyimpan barang-barang yang disewa di dalam sebuah

bank. Ini hanya di dalam bandar-bandar yang besar sahaja.

Menyimpan di tempat-tempat ini lebih selamat daripada menyimpan di rumah sama ada wang atau pun barang-barang kemas di rumah.

\* \* \*

Rukmi binti Haji Osman, Sekolah Agama Batu 9

Tanjung Karang, bertanya:

Bolehkah dan apakah hukumnya kita menjual barang kepada seseorang yang baharu sahaja dapat kemenangan loteri (kerana mungkin wang yang dibayarnya kepada kita itu adalah hasil kemenangan loterinya) dan adakah wang itu haram juga pada kita?

Jawab: Orang yang memenangi loteri itu adalah padanya hukum-hukum yang mengenainya. Kalau tuan menjual barang kepada seseorang, telah dapat persetujuan di antara tuan dengannya dan dibayarnya hendaklah diterima dan tidak ada kewajipan tuan untuk menyiasat daripada manakah wangnya itu datangnya.

\* \* \*

Jamaluddin bin Ahmad, Simpang Empat Semangkol

Bagan Serai, bertanya:

(1) Mengapakah di dalam Persekutuan Tanah Melayu kita ini bagai pihak orang-orang Melayu yang berpolitik mengadakan bermacam-macam pertubuhan (parti) seperti: UMNO, PAS, Parti Rakyat, Parti Negara dan lain-lain lagi. Akan tetapi semuanya parti-parti ini berkehendakkan kemerdekaan sekarang bukankah parti UMNO sudah mendapat kemerdekaan, mengapakah parti lain-lain itu tiada muh bersatu menjadi satu parti. Alangkah kuatnya kita orang kita jikalau dapat menjadi satu.

Jawab: Kepala sama berbulu, pendapat berlain-lainan

-kata orang tua-tua kita. Benar sudah merdeka tetapi masing-masing pihak mengambil pengertian lain-lain di dalam erti dan isi kemerdekaan itu. Sebab itu masing-masing pihak mengambil haluan dan tujuan masing-masing mengikut pengertian dan fahaman mereka di dalam menyempurnakan erti merdeka itu. Oleh kerana kebebasan diberi maka sudah barang tentu kebebasan fahamnya pula dibebaskan. Hanya negeri-negeri diktator sahaja yang menahan kemerdekaan seseorang.



Ubat beranak yang masyhur ini sangat digemari oleh ibu-ibu yang beranak di serata Tanah Melayu, Sarawak, Brunei dan Siam.

Dengan menggunakan ubat ini **tak payah berdiang – tak payah bersalai**, badan sentiasa sihat dan segar.

**Sekotak \$15.50 cukup untuk pergunaan sekali beranak. Tambah belanja pos 60 sen.**

Yahya Ariff

37, Jalan Kangsar, Kuala Kangsar